

I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

ARABAKO BATZAR NAGUSIAK

18/2016 Foru Araua, abenduaren 23koa, Ekonomia Jardueren gaineko Zergari buruzko 43/1989 Foru Araua, uztailaren 19koa, aldatzeko

Arabako Batzar Nagusiek, 2016ko abenduaren 23an egindako osoko bilkuran ondoko foru araua onetsi dute:

18/2016 Foru Araua, abenduaren 23koa, Ekonomia Jardueren gaineko Zergari buruzko 43/1989 Foru Araua, uztailaren 19koa, aldatzeko.

ZIOEN ADIERAZPENA

Jarduera ekonomikoen gaineko zerga zuzeneko zerga erreal da; enpresa, lanbide edo arte jardueretan aritze hutsa kargatzen du, ordenantza honetan ezarritakoari jarraituz.

Salbuespenen barruan, nabarmentzekoa da 2.000.000 euro baino eragiketa bolumen txikiagoa duten subjektu pasiboek buruzkoa.

Bada, orain, foru arau honen helburua da salbuespen horren aplikazio eremua murriztea, eta, hartara, eragiketen bolumen hori 1.000.000 eurokoa izango da.

Artikulu bakarra. Ekonomia jardueren gaineko zerga aldatzea (43/1989 Foru Araua, uztailaren 19koa)

Aldatu egiten da Ekonomia Jardueren gaineko Zergaren 5. artikularen 1. paragrafoaren c) letra (43/1989 Foru Araua, uztailaren 19koa), eta honela geratzen da idatzita:

“c) Eragiketetan 1.000.000 euro baino gutxiagoko bolumena duten subjektu pasiboak.

Ez-egoiliarren errentaren gaineko zergaren zergadunei dagokienez, establezimendu iraunkor bidez aritzen direnentzat baino ez da izango salbuespena, betiere eragiketetan 1.000.000 eurotik beherako bolumena badute.

Edonola ere, salbuespen hori aplikatzeko, ezinbestekoa izango da subjektu pasiboek ez izatea, zuzenean edo zeharka, letra honetan jasotzen den eragiketa-bolumenaren baldintza betetzen ez duten enpresen ehuneko 25 baino gehiagoko partaidetzarik, non eta ez diren arrisku kapitaleko sozietate edo funtsak, hain zuzen ere Sozietateen gaineko Zergari buruzko abenduaren 13ko 37/2013 Foru Arauaren 77. artikuluetan zehazten direnetakoak, baldin eta partaidetza sozietateen xedea betetzearen ondorio bada.

Letra honetan ezarritako salbuespena aplikatzeko erregela hauek hartu behar dira kontuan:

1. Eragiketa bolumena sozietateen gaineko zergari buruzko Foru Arauaren 5. Artikuluko 1. idatz zatian ezarritakoaren arabera kalkulatu da (37/2013 Foru Araua, abenduaren 13koa, sozietateen gaineko zergari buruzkoa).

2. Eragiketa bolumena, pertsona fisikoen errentaren gaineko zergaren edo sozietateen gaineko zergaren peko subjektu pasiboen kasuan edo ez-egoiliarren errentaren gaineko zergaren peko zergadunen kasuan, izango da haiei dagozkien aitorpenak aurkezteko epea zerga betebeharra sortu aurreko urtean amaiturik duten zergen zergaldikoa.

Zergei buruzko Foru Arau Orokorraren 35. artikuluko 3. idatz zatian aipatutako sozietate zibilen eta erakundeen eragiketen bolumena izango da zerga honen ziozko zorra sortu den urtearen azken aurreko urtekoa.

Zergaldi hori urte naturala baino laburragoa izan bada, eragiketen bolumena urtebeteraino igoko da.

3. Subjektu pasiboaren eragiketen zenbatekoa kalkulatzeko, hark egindako jarduera ekonomikoaren multzoa hartuko da kontuan.

Erakundea, Merkataritzako Kodearen 42. artikulua arabera, sozietate talde bateko kidea bada, lehenago aipatu magnitudeak talde horretako erakundearen multzoari egokituko zaizkio.

4. Ez-egoiliarren errentaren gaineko zergaren zergadunen kasuan, Espainian dauden establezimendu iraunkorren multzoari egotz dakiokkeen eragiketa bolumena hartuko da kontuan.”

XEDAPEN IRAGANKORRA

Lehenengoa. 2017, 2018. eta 2019. zergaldietan aplika daitezkeen hobariak

1. Xedapen orokor honen bidez orain aldatzen den foru arauaren 5. artikulua 1. paragrafoaren c) idatz zatiaren aurreko erredakzioarekin bat etorritik, ekonomia jardueren gaineko zergatik salbuetsirik egongo liratekeen subjektu pasiboari edo 2017ko urtarrilaren 1az gerotik jarduera ekonomiko hastean egon ahal izan ziren subjektu pasiboari, orain sartzen den aldaketaren bertutez zerga kuota ordaindu beharra sortzen bazaie, zergaren azken kuotari, den probintziakoa edo estatukoa, hobaria aplikatuko zaie, ondoren aipatzen diren ehunekoen eta zergaldien arabera:

ZERGALDIA	HOBARI APLIKAGARRIA
2017	ehuneko 75
2018	ehuneko 50
2019	ehuneko 25.

2. Ekonomia jardueren gaineko zergaren azken udal kuotari hobaria aplikatuko zaio, aurreko kasuetan aipatzen diren kasu beretan, 2017, 2018 eta 2019ko zergaldietan, Udalak bere zerga ordenantzan determinatuko duen ehunekoen arabera.

Bigarrena. Zerga ordenantzak egokitzeko epea

2017ko uztailaren 1a arteko epea izango dute toki erakundeek zerga ordenantzak aldatzeko, haien edukia foru arauan aurreikusitakoari egokitzeko.

AZKEN XEDAPENAK

Lehenengoa. Indarrean sartzea

Foru arau hau ALHAON argitaratu eta hurrengo egunean sartuko da indarrean, eta 2017ko urtarrilaren 1etik aurrera sortzen diren zerga betebeharretan eta hurrengoetan izango du eragina.

Bigarrena. Gaitzea

Gaitasuna ematen zaio Arabako Foru Aldundiari xedapen orokor hau garatzeko eta aplikatzeko beharrezkoa den xedapen oro eman dezan.

Vitoria-Gasteiz, 2016ko abenduaren 23a

Presidentea

PEDRO IGNACIO ELÓSEGUI GONZÁLEZ DE GAMARRA